

եթէ զիւրեանցսն նախապատիւ համարելով ժխտեսցեն ,
 և 'ի Ս. Տունն չխնայեսցեն , պատժեսցին և յանարգս դա-
 սեսցին , և զայնպիսիսն անպատճառ առանց ակնառութեան
 միաբան կնքով նշանագրեսցեն Խորհրդականքն , և ցուցցեն
 մեզ զի գիտասացուք և մեք , և ըստ արժանոյն վարձատուր
 լիցուք : Սոյն կարգ եղիցի և ամենայն Ռէյիզաց վանորէից
 ներքնոց և արտաքնոց :

9°. Նուիրակութեան մեծ կոնդակն՝ Ս. Աթոռոյն եւ
 Պատրիարքի կնքովն լիցի (ըստ նախնեաց), բայց յիշեսցի
 'ի կոնդակին թէ (խորհրդով և միակամ ընտրութեամբ
 Սրբոյ Աթոռոյս եօթն Խորհրդական անուանեալ եղ-
 բարց՝ առաքեցաւ այս անուն Նուիրակն), եւ բաց յայն-
 մանէ նոքին իսկ Խորհրդականքն տացեն 'ի ձեռս Նուի-
 րակաց կնքով եւ ստորագրութեամբ իւրեանց գիր իմն .
 յանուն Առաջնորդաց իւրաքանչիւր վիճակաց և Քահանա-
 յից և Նշխանաց յատկապէս յիշելով համառօտ զնեղութիւն
 Ս. Տանն , և յորդորելով 'ի հոգատարութիւն Նուիրակին
 և յարդիւնաւորութիւն տրոց և այլն և այլն : Նոյնպէս և
 Պատրիարքն ուրոյն ուրոյն դրով և կնքով իւրով գրեսցէ
 յանձնարարութիւն և 'ի սէր թէ 'ի մեծն Պօլիս , եւ թէ
 յայլ ամենայն տեղիս :

10°. Յանուն Ս. Աթոռոյն իւզագին և մոմագին , եկաւ
 հասաւ , օրհնութիւն կոնդակաց անուանեալ զողորմու-
 թիւնսն ուխտաւորք մատուցեն Սրբազան Պատրիարքին ,
 և նա յանուանէ արձանագրեսցէ 'ի տումար և 'ի ժամանա-
 կին ըստ տումարին յանձնեսցէ Խորհրդականաց 'ի հաշիւ
 Ս. Աթոռոյն : Իսկ յանուն Ս. Յարութեան տաճարին , Գե-
 րեզմանին Քրիստոսի եկեալքն և եղեալքն՝ նորին Ռէյիզին
 տացեն , և նա օրհնութեան գիր տացէ ըստ սովորութեան .
 և յետ Ս. Զատիկին ընդ այլ արդեանց տացէ զհաշիւն Խոր-
 հրդականաց : Նոյնպէս և յանուն ժամարարաց եկեալ եւ
 եղեալ քառասնից և յիշէք և ժամուց պատարազի օղոր-
 մութիւնքն տացեն Աւագ Լուսարարին , որ և ըստ սովո-
 րութեան 'ի տումար առեալ տացէ գիր օրհնութեան և
 զկնի Ս. Զատիկին բաժանեսցէ ժամարար վարդապետաց
 և սարկաւազաց առանց զրկողութեան արժանաւոր մշա-
 կաց գիտութեամբ Խորհրդականաց :